



Brev dato: 30-03-2023
Sagsnr. 2023 - 4419
Akt. nr. 22693566

Postboks 1614
3900 Nuuk
Tlf. (+299) 34 50 00
E-mail: nap@nanoq.gl
www.naalakkersuisut.gl

Inatsisartunut ilaasortaq
Mariane Paviassen, Inuit Ataqatigiit
/Maani

Inatsisartut Suleriaasaanni §37 naapertorlugu ILO nr. 169 pillugu Naalakkersuisunut apeqqutaanut akissut.

Asasara Mariane Paviassen

Inatsisartut suleriusaanni §37 imm. 1 aallaavigalugu ulloq. 15. februar 2023
Naalakkersuisunut apeqquteqaatinik nassiuissaqarsimavutit,
akissuteqaatiiliornissannullu innersuunneqarpunga.

Apeqquteqaammut pingaaruteqarluinnartumut nassiusisimaninnut
qujassuteqarfigerusuppakkit.

Naalakkersuisumut allamut apeqqutitit akissuteqarfigineqartussanngorsimaga-
luarmata kingusinnerusukkut akissuteqartariaqalersimancerput ajuusaarutigaara.

Apeqquteqaatinnut atatillugu Naalakkersuisut akissuteqaateqarput.

- 1. Naalakkersuisut isumaqarpat Naalagaaffiit Peqatigiit Nunat Inoqqaavi Inuaallu Naggueqatigiit Naalagaaffinni Namminersortuniittut pillugit ILO-mi isumaqatigiissutaat nr: 169 Kalaallit Nunaata innuttaanut atuuttoq?**

Akissuteqaat:

Aallarniutigalugu maluginiaqqussavara apeqquteqaatip kalaallisuuu danskisuualu assigiinngissuteqarmata. Kalaallisuuani "kalaallit innuttaasut" innersuussutaanngilaq, kisiannili "Kalaallit Nunaanni innuttaasut" imaluunnit Kalaallit Nunaata inui pineqarput. Kalaallit oqaasii nunatsinni pisortatigoortumik oqaassiummata akissuteqaatissanni kalaallisut allassimaneri aallaavigissavakka. Tassa imaappoq apeqqummi pineqarpoq ILO 169 qanoq annertutigisumik Kalaallit Nunaanni innuttaasunut atuunnersoq tikinniarneqarpoq.

ILO 169 Kalaallit Nunaanni innuttaasunut tamanut atuutinngitsutut Naalakkersuisunit isumaqarfigineqarpoq. Taamaammatt isumaqatigiissutip atortussaalersinneqarneranut atatillugu Danmarkip oqaaseqaataa Naalakkersuisunit suli atuuttutut isigineqarpoq. Oqaaseqaat ima nipeqarpoq: "Isumaqatigiissumi nr. 169-mi nunat inoqqaavi ataatsit taamaallaat Danmarkimit isiginiarneqarput. Taakku tassaapput Inuit imaluunnit Kalaallit Nunaanni nunat inoqqaavi".

Naalakkersuisunit tamanna isumaqatigineqarpoq. Naak Kalaallit Nunaanni innuttaasut Inuit/Kalaallit kingoqqiffigisanit allamit kingoqqisusut akornatsinni inooqatigigaluarivut tamanna suli atuuppoq. Ilutigalugu ineriantornerput namminerlu oqartussaaqataanitta annertusarnerani ilungersuuteqarnitta,

kingullertut Namminersorlutik Oqartussaalernitta, kalaallit kulturitta oqaluttuarisaanittalu innuttaasunit siammasissumik peqataaffigineqarneratigut kulturitsinni namminiilivinnissatsinnillu kissaateqarnitta periarfissaqarnittalu annertusiartortinnissaa ineriertortinneralu ingerlatiinnassavarput.

Ullumikkutut inisisimatilluta aalajangersakkat assigiinngitsut oqartussaaffiit Namminersorlutik Oqartussanit tiguneqareersimasut ILO 169 ataanni inisisimapput. Oqartussaaffiit nammineerluta oqartussaaffigilersimasavut eqqarsaatigalugit aalajangersakkanik eqquutsitsinissamut qulakkeerinnittussat tassaapput Naalakkersuisut, danskit naalagaaffiaanngitsoq.

ILO 169 Kalaallit Nunaanni innuttaasunut tamanut atuutsitinneqannginneranik oqariartorneq ilutigalugulu innuttaasunik immikkoortitsinissamut inerteqqummik peqartoqarnera atuutsitsinermi ajornartorsiutigineqanngilaq.

Naalakkersuisut Kalaallit Nunaanni inuit qinigaattut naalakkersuisuupput, taamaallitutik aamma nunatsinni nunat inoqqaavinut. Taamaattumik ILO 169-mi aalajangersakkat Kalaallit Nunaanni aammalu danskit naalagaaffiannut attaveqarnermi ataavartumik qulakkeernissaat Naalakkersuisunut suliakkiissutaavoq.

2. Naalakkersuisut Naalagaaffiit Peqatigiit Nunat Inoqqaavi Inuaallu Naggueqatigiit Naalagaaffinni Namminersortuniittut pillugit ILO-mi isumaqatigiissutaat nr: 169 Kalaallit Nunaata innuttaanut atuunnera nangaanartoqartippaat?

a. Akissut aappiuppat nangaanartoqartitsineq nassuiaqququneqarpoq.

Akissuteqaat:

ILO nr. 169 pineqartillugu, kalaallit inuinut tunngatillugu Naalakkersuisut nangaanartoqartitsinngillat. Taamaattorli ILO 169-mi aalajangersakkat eqqarsaatigalugit qanoq paasineqarnissaat atuutilersinnissaallu eqqarsaatigalugu, Kalaallit Nunaata Namminersorlutik Oqartussaanerani apeqquterpaalunnik suli akineqannngitsunik peqartoq Naalakkersuisunit oqaatigissavarput.

ILO-mi isumaqatigiissutip 169-p paasinissaanut atuutilersinnissaanullu tunngatillugu eqqarsaatigisassatut Naalakkersuisut aallaavittut isumaat unaavoq; ILO 169-i Naalagaaffiit nunallu inuiisa ataqtigiinnerannut tunngasuusoq. Tassa imaappoq Kalaallit Nunaat eqqarsaatigissagaanni Naalagaaffiup Danmarkip Kalaallit Nunaanni Inuit, nunat inoqqaaviusutut inuttullu ataasiakkaattut attuumassuteqarpoq.

Taamaammat ILO 169-mi aalajangersakkat aalajangersimasumik Kalaallit Nunaanni Namminersorlutik Oqartussat nunat inoqqaavi, Inuit, akornanni atorneqarsinnaasunik aalajangersagaqanngilaq. Taamaammat ammasumik tamallu oqartussaaqataaneranni periutsit atorlugit nunatsinni nunat inoqqaavi pisinnaatitaaffii

eqqarsaatigalugit qanoq pitsaanerpaamik siuarsarneqarsinnaaneri oqallisigissallugit pingaaruteqarluinnarpoq. Taamaalilluta anersaaq, nunat inoqqaavisa pisin-naatitaaffii aammalu nunat inoqqaavisa akuliutitinneqarnerisa ataqqineqarnissaat tassuuna ILO 169-ikkut anguniarneqartoq ataqqissavarput.

Taamaattumik Kalaallit Nunaanni tunngaviusumik inatsisisamut isumalioqatigiissitap suliassaanut Naalakkersuisut naammaginnilluarput, ima allassimasumut (issuaavunga):

”Tunngaviusumik inatsisisaq kalaallit kulturiannik, oqaasiinik kinaassusaannillu tunngaveqartumik sinaakkusersorneqassaaq.

Oqaluttuarisaaneq aallaaviulluni kalaallit kulturiat, kalaallit oqaasii kinaassusaallu akuunerulersitsiniarnermi tunngavigineqassapput, tassa nunap inoqqaaviniit tunngavillit. Tunngaviusumilli inatsisisami Kalaallit Nunaata killiffiani nalitsinni inuusut allatullu tunuliaqtaqarlutik nunami najugaqartorpassuit eqqarsaatigillu-innarneqassapput.”

Inussiarnersumik inuullaqqusillunga


Vivian Motzfeldt